

Date – 01/10/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. **Health Dept chuan hriattirna tichhuakin, tunlai hian ram pumah Influenza natna a leng tih a tarlang a; fimkhur turin mipui a chah.**
2. **Tunhnai Raw Thing Tam avanga sazu puang chungchanga hmalakna te Agriculture Minister Pu PC Vanlalruata kaihhruaia thlirho a ni.**
3. **Union Agriculture Minister Shivraj Singh Chouhan-a chuan ramchhunga fu chingtute harsatna sukiang turin special team an din dawn tih a sawi.**
4. **Pakistan-a Balochistan huamchhunga Paramilitary Frontier Corp Headquarters, Quetta-a bomb puakah mi 10 an thi**

<><><>

IDSP

National Health Mission, Mizoram hnuai Integrated Disease Surveillance Programme (IDSP) chuan hriattirna tichhuakin, tunlai hian ram pumah Influenza natna a leng tih a tarlang a; fimkhur turin mipui a chah.

IDSP chuan Influenza natna hi Mizoram chhungah pawh hmun hrang hrangah vei an awm tih hriat a nih thu leh Lunglei District ah pawh School pahnih chu hrileng avang hian khar a lo nih tawh thu te, he natna hi inkaidarh theih a nih thu leh inven fimkhur a tul thute a tarlang a; Influenza natna laka inveng tur hian puipunna hmuna awm tam lo turin mipui a chah bakah, mit, ka leh hnar te khawih loh tur te, midang nen kut leh kut in vawn / inchibai lo hram turte, mahni rinthua damdawi ei lo turtein a ngen a ni.

Hrileng laka him tur hian khuh leh hahchhiau laiin hmui leh ka hup thin tur te, sahbawna fai taka kut sil thin tur te, thil tuiril lam in tam tur te, hritlang khawsik neite chu midang hnaih lo tur te, loh theih loh anih pawh in hmaituamna hmang tur leh influenza natna neia inringhlelte chu doctor rawn turin a chah.

IDSP chuan Influenza natna hi mi tam zawkin an dampui mai laiin mi thenkhat ah chuan enkawlna mamawh zual an awm thu a tarlang a; raipuar, nausen, kum upa lam, natna benvawn neite leh hun rei tak chhung damdawia in enkawl ngai te chu fimkhur zual ngai bik an nih thu te, ni hnih khat hnu pawha hmasawn thei lo leh thawk lama harsatna neite chu damdawiin pan vat turin a ngen bawk a ni.

<><><>

DAMPA E ROLL

Dampa Assembly bial By-Election a hman tur Electoral Roll kimchang chu nimin khan District Election Officer Pu K.Laltlawmlovan a tlangzarh.

Final Electoral Roll ah hian Vote nei zawng zawng Mipa 10605 leh hmeichhia 10185 an vaiin 20790 an ni a, Draft Roll atanga vote nei punna ni 385 a ni.

Pu K.Laltlawmlova chuan India khua leh tui dik tak, kum tling chin, Roll-a chuang te'n, khua leh tui an nihna anga an chanvo an hlen theih nan, an aiawha rorel tur thlang turin Dampa bial By-Election ah vote thlak theuh turin a sawm a ni.

Final Roll tlangzarh takah hian Polling Station 41 awmin, Polling Station Pakhat zelah Elector 507 awm ang an ni a. Voter tlemna ber hi Zopui Polling Station niin Voter 30 an awm a, Voter tamna ber hi Silsury -I Polling Station a ni a, Voter 1103 an awm a. Service Voter hi 115 a awm bawk a ni.

Dampa Assembly bial Final Electoral Roll tlangzarh tak hi Pu K.Laltlawmlova, District Election Officer chuan Political Party aiawhte hnenah a hlan nghal a ni.

<><><>

AGRI MINISTER

Tunhnai Raw Thing Tam avanga sazu puang chungchang sawiho turin nimin khan Agriculture & Farmers' Welfare Department Minister Pu PC Vanlalruata chuan a office-ah department official pawimawh te a ko khawm a; district hrang hranga hmalakna kal mek te thlirhoin, hmalak zel dan tur te an ngaihtuah a.

Raw Thing Tam avanga sazu puang avang hian hriat theih chinah khaw 138 velin harsatna an tawk mek a, Agriculture Department chuan DAO kaltlangin, farmer te hnenah sazu tur—bromadiolone, zinc phosphide te tam tham tak a sem tawh a, sem tur hmabak pawh eng emaw zat a la awm a ni. Sazu puang nasatna khuaah te chuan VC te nen tangkawpin department chuan sazu hraihlum hna a kalpui mek bawk.

Meeting-ah hian Agriculture & Farmers' Welfare Department Secretary Pu Ramdinliani; Director Pu R Lalnunzira te leh officer dang eng emaw zat an tel a ni.

<><><>

GST

Consumer Activist Pu Lallunghnema, Centre For Consumer Education Chairman ni bawk chuan sorkar laipuiin GST rate thar a kalpui chu consumer-te tan malsawmna a nih thu sawiin, dawrkai leh sumdawngte chu GST dan thar hi zawm ngei turin a ngen.

Akashvani zawhna chhangin Pu Lallunghnema chuan, sorkar laipuiin GST dan thar India ram puma hman tura a ruahman chu mipui (consumer)-te tan thil lawmawm tak a nih thu a sawi a; sumdawwna bungrua tam zawk chu a

mante pawh tlawm tur leh hniam tura ngaih a nih thu sawiin, hemi in a nghawng tur chu consumer-te an nih thu a sawi.

Pu Lallunghnema chuan GST thar hi mipui tana malsawmna a nih ngei theih nan Centre For Consumer Education chuan theihtawpin sorkar hmalakna an tawiawm dawn tih a sawi a. Sairang thlenga rel kawng hawn a nih tâk avangin Mizorama lo lut bungrua chi hrang hrang man pawh tlahniam tura ngaih a nih laiin bungrua engemaw zat rel lo luh hma ang tho a man rate tihsan a nih thu a sawi a; sumdawng leh dawrkai tu pawh an bungraw man tisang lo tur leh MRP aia sang a thil hralh lo tur te, bûk tling lo zuar lo tur te, bungrua expire tawh zuar lo tur te, bungrua hman tlak loh leh ei tlak loh kawl lo tur leh zuar lo turin sumdawng zawng zawng an ngen bawk a ni.

Sorkar laipuiin GST chhiah a tih hniamna, GST 2.0 chu Lungleia dawrkai tam tak chuan anihna tak an la hrechiang lo tih an sawi a, Civil Hospital Lunglei Canteen dawr neitu Pi C. Ramdingliani chuan GST 2.0 kalpui ani tih chu an hria a, mahse engtinge an tinhniam dan tur leh engtia kalpui tur nge tih tak an la hre lo a ti a. Khawi atang maha chiangtaka hrihfiahna an la dawn loh thu leh anmahni mai chuan Tax return emaw thil dang neuh neuh hriatthiam loh an la ngah tih a sawi a, Invoice pawh an pek chhuah ngai loh thu a sawi.

Hetihrual hian Tax pek chu khua leh tui an nihna anga an tih tur a ni a, tax pek a hreh lo tih sawiin GST a hniam avang hian an tan hlohna a awm dawn lo tih chu a pawm dan a ni tih a sawi bawk.

Dawr kai tam zawk erawh in Agent te hnen atanga la chhawng an nih ve avangin GST tih kher leh Invoice pek chhuah chu enge a tangkaina tih chu kan CORR in zawhna a dawn tam ber a ni.

<><><>

KOLASIB

Kolasib Khuangpuilam VC ten an Veng chhung a fai zawk theihna tura Plastic Bottle/bur ruak an leikhawm, Kolasib Bawlhhlawh sawngbawlina Solid Waste Management Centre a paih turin Pi Josephine Zonunsangi, DUDO, Kolasib chuan nimin khan a vailiam

Pi Josephine Zonunsangi chuan Khuangpuilam VC ten an Veng chhung Faina lama hma an lakna chu chhuanawm a tih thu a sawi a. Kolasib District chhunga VC hrang hrangah hetiang zawnga hma la hmasa ber ni a a hriat thu sawiin, an hmalakna chu chhunzawm zel tlak a ni, a ti a, tawp san mai lova chhunzawm zel nise a duh thu a sawi. An hmalakna chu ringtu kan nihna nen pawh inhmeh tak anih thu sawiin, ringtu kan nih chuan Faina kan nunpui a tul a, Kristianna leh faina hi a kalkawp tlat tur a ni' a ti bawk.

DUDO chuan Plastic Bottle ruak leikhawm chu UD&PA lam chuan Waste to Wealth tiin an sawi thu tarlangin, Bottle ruak chu Solid Waste Management Centre ah phurhthlak a ni ang a, Bailling Machine hmangin Bailling tih a nih hnuah State pawn ah kan hralh leh ang a, a hralhna chu sorkar Revenue ah kan chhung lut dawn a ni, a ti.

Khuangpuilam VCP member Pu Lalsiamkima chuan Faina lama hma an lak dan sawiin, Swachhata Hi Sewa pualin khawtlang huap hnattlang vawi hnih an neih tawh thu te, an Area chungna Zirna In leh Office awm te chu an hmun hma tifa tura an ngen thu te, Tuihawkluanawr thian fai tura VC ten hlawhfa an rawih thin thu a sawi a. Plastic Bottle ruak an lei khawm chu kar kalta Inrinni atang khan kalpuin Thawhtanni thlang khan Rs 30,000/- chuang man an leikhawm thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawin chawhnu dar 2 leh a chanve-ah Chanchinthar puan leh a ni ang.

<><><>

UNION AGRI

Union Agriculture Minister Shivraj Singh Chouhan-a chuan ramchhunga fu chingute harsatna sukiang turin Indian Council of Agriculture Research nen tangkawpin special team an din dawn tih a sawi. Union Minister chuan Consultation on Sustainable Sugarcane Economy ah he thu hi sawiin an team din turte hian fu chin leh hralh chungchangah policy an duang ang a ti a. Loneitute, scientist leh industry lama lo sawngbawltute thurawn la chungin zirchingna leh policy hi an siam ang a ti a. He zirbingna hi loneitute hamthatna ber tur anih thu a sawi a ni.

<><><>

PAKISTAN

Pakistan-a Balochistan huamchhunga Paramilitary Frontier Corp Headquarters, Quetta-a bomb puakah mi 10 an thi a. Mi 30 chuangin hliam an tuar. Balochistan Health Minister sawidanin mitthi zingah hian sipai pahnih an tel a, midang zawng hi chu civil mi an ni a. Sipaite chuan pawikhawhtute an chhanletnaah firfiak paruk an kahhlum thu sawiin an zingah hian thihchilh bomb pai pawh a tel a. An inkah hnu lawkah a bomb pai hi a tipuak niin sipaite chuan an sawi.

<><><>

SEVA PARV

Mipui rawngbawl leh sawrkar inrelbawl na tha thupua neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv ah chuan India in G20 hlawhtling taka a kaihhruai dan tarlang ila. PM Modia hnuaiah India chu khawvel ram hruiatu pawimawh zingah hlankai a ni a. Kum 2023 a India in G20 President anih chungin khwvel chhim lam ramte a ngai pawimawh hle a. he bakah hian African Union ramte telh an ni a. Global Biofuels Alliance din a ni baw. Hei bakah hian New Delhi Declaration ziah niin hetah hian sumdawnnate, sik leh sa siamthat tel leh khawvel harsatna hrang hrang sukiang tura inremna ziah a ni a. Member ram 20 ten hming an ziaak vek a ni. Prime Minister Modia chuan G20 a India President

nihna chuan ram te zawkte tan aw chhuahna hun a thlen thu a sawi a ni.

<><><>